

四庫全書

集部

欽定四庫全書

文忠集卷二十二

省齋文藁二十二

宋 周必大 撰

啟

回新同官黃從事石啟

紹興二十九年三月

伏審欽承丹詔來紹青衿惟才華舉世以推高士類望
風而歸重恭以某官識明慮遠學廣聞多北闕上書早
結知於真主春官擢第亟傳道於雄藩亦嘗分教於宗

英乃復洵司於侯類甫聽鴉音之革即觀鱸服之頒某
久徯同僚忽勤執訊瑕邱甚拙正資董相之通經至德
何能更賴劉公之解事其為心悅詎可文陳

回溧水唐宰錫啟

四月

伏審九重出命百里得賢錦素製而才優琴甫鳴而化
洽伏以某官懿行孚乎鄉黨高文播於縉紳將觀展驥
之能先試割雞之手昔者孔門高弟多由出宰以成名
暨乎漢氏諸賢或用徒勞而興歎蓋古以社稷民人為

重而此惟簿書期會之趨自非慈惠之師孰識後先之
序三岑未遠四長何慙某久矣聞風茲焉托庇豈謂蜚
鴻之信亦臨羅雀之門感幸則多喻言徒費

賀李大夫植自湖北漕移江東啟

伏審止節湖陰改轅江表事愈繁則才愈見地彌近則
眷彌深成命初頒先聲已振恭惟某官道隆德盛學富
文雄杖策而謁軍門早効房喬之智受釐而坐宣室脩
輿賈誼之思帝階甫遂夫對揚天語屢形於歎獎剖符以

去雖進取之甚廉垂傳而行知褒遷之未艾曾靡淹於
歲月果移按於封畿惟此外臺號為要路竊詳稽於近
世皆入蓬於邇聯矧明公望實之已孚而聖主簡知之
有素紫樞黃閣蓋方虛位以待焉赤輓斑輪是亦假途
而進耳某萍飄孤迹匏繫微官將庇賴於卿雲稍激昂
於儒氣莫陪縣令為漢使之先驅當與諸公俟何公之
行部其為欣頌固罄名言

謝江東吳漕舉改官狀

兼提舉學士七月

志在求賢方切緇衣之好名非出衆首膺華袞之褒心
感激而固深顏忸怩而亦厚竊以公論明於上先王存
歲貢之規私義行於家後世著月評之目明於上則可
助朝廷之治行於家則但為鄉黨之光此人材榮滯之
攸分實王政廢興之所係於皇昭代有掩前聞分道置
臺豈特轉輸於饋運乘輶按部是將甄別於賢愚矧載
育於文風尤申嚴於學政維時十部不越三章游大人
以成名時方競進占小善以率錄舉則誰先雍齒封焉

漢軍驚矣伏念某生而極陋少也多屯道未見而迷方
學未成而筮仕言游芹水密庇卿雲恭行不足以率人
詞章不足以名世懶書晝寐幾為弟子之嘲騎馬醉歸
常畏廣文之罵空縻寸祿實愧初心誓將矻矻以窮年
恥復栖栖而為佞固非韞匱有美之玉庶免躍冶不祥之
金不汝瑕疵已為厚幸在公鑪錘斯亦何名此蓋伏遇
某官粹德尊朝英詞冠古獻納將歸於邇綴澄清荐試
於近畿文紀埋輪外振使乎之職鄭莊推轂內推長者

之心第慚賈誼之才不稱河南之薦載念某趨風雖晚
託契則深先父聯名已列年家之子南宮試藝又為門
下之生茲居巡管之中復在推揚之數恩榮參會焉鈍
增光知我者春秋初靡緣於介紹報之以瓊玖請申誦
於詩章

賀金陵韓帥啟

伏審輟臨北固來尹東郊厥德允修膺畢命保釐之托
惟民其乂賴君陳分正之功溫詔風馳輿情草偃恭惟

某官學皆自得道本躬行粲若詞章妙合璧聯珠之句
凜然風采挺渾金璞玉之姿惟聲猷居衆雋之先故眷
簡絕諸臣之右所臨宜大厥問日彰鳴玉甘泉首冠荷
橐論思之列奉璋泰時獨膺栢梁賡載之歌至於振淹
滯於三銓究源流於萬貨投之盤錯鋒銚並礪而莫撓
試以妍媸冰鑑愈明而畢照內鎮神臯之壤外綏南海
之區開閭勸民延壽化行於馮翊投文逐鰲退之威著
於炎陬方將入贊於事樞乃屈荐臨於藩翰蓋大用必

資乎詳試而重權莫越乎居留非信而謹者不足以付
管鑰之權非剛而明者不足以任兵民之寄宜聖上疇
咨而弄印惟我公僉屬以分麾十乘鼎來雖慰江東之
父老三槐夾輔已虛朝右之班聯豈待政成即聞王覲
某才非秀穎迹困飄流念昔備於屬僚幸獨蒙於眷顧
茲塵泮水復在下風以五經而授諸生有愧東都之文
學作三篇而選童子願歌西蜀之中和欣憚居多名言
莫盡

賀湯左相啟 十月

伏審明制揚廷首台正位暨湯咸有一德久合天心惟
說命總百官益符帝賚變調雖舊體貌加新竊以奮庸
固賴於臣鄰注意莫先於元輔如羣才之參大廈獨倚
棟隆若列宿之拱北辰孰踰魁望故舜重九官之冠而
周殊太宰之名豈徒旒纁之仰成抑亦簪紳之絕擬於
皇上聖懋啟中興仰惟前代而迪厥官方慎冢司之選
爰立作相而置諸左必歸間世之英恭惟某官道貫誠

明運逢開泰早攄匡濟之學親結聖神之知獻納禁途
備賢人之德業周旋正路茂君子之經綸曩自籌帷延
登宰席雖元功密運如陰陽造化以難窺然嘉績外彰
有歲月事為之可紀上則五行之布敘下焉百穀之用
成鎮撫蠻夷而疆場自安招延豪俊而滯淹咸振賞刑
並設勸懲各當於罪功職業交修總覈莫逃於名實至
於獎耆英而敦風俗薄賦斂以厚生靈成規恪守於祖
宗浮費力裁於中外相大廷之禮需章預避於褒遷奏

實錄之篇謙德反推于筆削悉哀衆美度越前人宜萬
乘之深知非羣工之敢望謂僕射百僚之首無官可酬
惟春秋一字之褒虛左以待僉言久屬渙號用敷就陞
上相之班永贊太寧之化文武之道識其大者方將疊
疊於蒼姬蕭曹之勛不足進焉夫豈區區於炎漢某嘗
叨恩顧逖阻師瞻茲拭目於黃麻彌傾心於赤烏壽域
開而鴻鈞轉重歌韋賢拜相之詩祥風翔而和氣游願
上宣帝得臣之頌其為欣抃實倍等夷

賀孟宗丞除江東運判啟

伏審璽書中出金節外移千里長淮南離舊治六朝故
國已及新疆光華增煥於一時賓餞交馳於兩境恭惟
某官道諛儒行學詣聖真少日懷鉛預纂兩朝之信史
盛年結綬入修三格之新編隨從鷄翹遽辭虎尾以典
郡則著循良之効以察州則飛廉按之聲駟駱載驅宣
勞惟舊豺狼當路悉力以除既仁者之勇聞亦使乎之
責塞近畿劇部少酬久次之庸禁路清班即奉道歸之

詔某讀書既晚從仕數奇竊伏海濱聞公子者舊矣久
逃空谷聽足音而楚然況以微官焉依厚庇曳裾有路
固當輕萬戶之封拆襪無長恐未免衆人之遇其為欣
悚交集襟懷

賀提點李直閣植薦舉啟

十二月

環九路以掄才豈無奇士紆數言而削牘乃及腐儒衆
以為榮心焉有愧竊以知人之法自昔所難引類之方
於今尤獎羊質虎皮之莫辨駑才驥足之並馳游揚多

藉於先容囑託更資於奧援乃以有限之數而應無窮
之需三沐三薰求之固未易矣一與一否舉者亦惟艱
哉必將少振於頽風莫若力持於公論我心匪鑒詎可
形逃仁者樂山豈容力拔惟知此道遑恤其他恭惟某
官望重儒林勲高霸府飭躬以有用之學應務以不羣
之材自賦命以登車每盡誠而推轂未處棘槐之位先
成桃李之陰孰謂膺門亦容噲伍伏念某志徒好古材
不逮人小智自私絕望紆朱之樂大方見笑甘心尚白

之嘲一蒞芹宮再徂芳歲菊荒舊徑時夢于刀頭刃發
新硯實慚於錐末比緣天幸獲庇霜臺區區數月之間
纔能免咎役役衆人之後安所取知忽形論薦之言莫
測蚤緣之自雖品題斯誤三復多慙然授受之公兩皆
無歎某敢不深思國士之報少答古人之風同薄命於
史談敢歎周南之滯遇賞音於伯樂能令冀北之空

賀王同知除知院啟

紹興三十年正月七日

伏審廟算成功幾廷推長帷幄決勝千里運籌專倚於

子房文武為憲萬邦受祉孰先於吉甫雖不移於兵本
實增峻於民瞻竊以象著西垣將相對分於四輔色齊
北斗魁樞首冠於七星於赫聖朝仰稽乾度盡以韜鈴
之柄總之宥密之司昔嘗兼掌于相臣今乃獨鑿于院
事求懿德而肆時夏方永保於橐弓惟吉士而相我家
茲共圖於立政恭惟某官潛心聖學冠德民彛孟軻之
傳得其宗伊尹之覺以此道綢繆異眷翦要津自參
華於豹尾之中即秉務於鴻樞之上助宣七德坐閱累

年借箸於前有謀猷而必告積薪於後無喜愠之可窺
又疇久次之庸始正通知之拜屬聖上擇人而絕幕繫
忠誠憂國以忘家抗疏請行漢廷臣無出右者奉書歸
報古虜使其猶劣諸將宅揆於元台始升班於右府使
國人皆有所式豈惟中外之聳觀示天下弗復用兵蓋
亦華夷之永賴某受恩殊厚聞命祇歡方局促於芹宮
阻進趨於材館高山仰止幸再逢岩石之新一葦航之
毋使歎瀛州之遠其為欣懌實倍等夷

回溧陽蔣宰賀年啟

杓攜龍角日會諏訾惟時慈惠之師宜介靖共之福恭
惟某官一司重任三異政殊宣布寬書俾民編之交泰
蠲除宿弊隨歲律以鼎新道既方亨慶將焉往某居然
在泮邈矣登門槁蒸甚華想夢謝池之草尋芳伊邇遙
瞻潘縣之花善頌攸深文陳曷喻

賀邢倅孝肅啟

詔檢中頒屏星夙駕贊管鑰居留之尹屈蓬瀛寓直之

仙望實所加旄倪交慶恭惟某官英規玉立麗蒸瓊敷
長鋏短檠事業並風騷之將朱輪華轂功名非息澤之
侯方時左戚而右賢力草外輕而內重故資雋望詳試
民庸蕩漾秦淮聊復問津於半刺岩嶷魏闕即陪奉引
於拾遺某積歲傾風指期托庇願與紛紛之振鷺共親
壘壘之談犀欣頌交深喻言曷既

賀蘇倅啟

陪京地重別駕官尊任既得賢人斯交慶恭惟某官熙

陵勲臣之裔元祐儒相之孫慷慨功名固嘗自許淵源
學問寧愧家傳以茲人物之英宜在羽儀之列云胡外
補猶滯右遷蓋惟魏國之賢早著江寧之政故迂泥軾
來訪甘棠海沂之賴王祥少資佐理宣室之思賈誼即
聽遄歸某才不如人仕惟竊粟念傾風之甚久喜披霧
之在茲豈特區區仰藉幘幪之庇亦將纒纒歛聞議論
之餘欣幸居多指陳曷喻

謝金陵帥韓尚書啟

二月一日

剛嚴少許人爭冀于混奇薦舉有名恩首加於紆等欽
惟公選實激懦衷竊嘗屈指於先賢孰不垂情於後進
然汗簡編摩之可考惟華宗獎拔之為多舉壺遂而進
臧君世稱安國荐崔生而引嚴武時重朝宗或知鄧惲
而諉以子孫或識西平而遺之器幣既奕葉素高於風
鑒宜真才復振於家聲倘非蹇仕路之英寧許上公車
之牘如某者直非諤諤甚期期居貧微指廩之交處
衆乏容卿之量訪書臺於東觀勇愧除蛟回俗駕於北

山心慙怨鶴，謁遊泮水坐。閱再期，無五經之縱橫，可為模範。有二揖之簡忽，徒致謗憎。職以曠聞，分宜罪免。竊幸荊州之識，俯憐絳勃之庸。爰自下車，即形慰藉。逮茲推轂，更誤品題。永言待遇之殊，初非夤緣之助。此蓋伏遇某官功高三傑，文倡諸儒。曳履中臺，獨厚龍淵之賜。擁麾南海，載揚鰲水之威。聖神嘉鯁，峭之資內外。著虔共之譽，吾用休而安。社稷將踐，政塗王錫侯而粲旂章。荐臨藩服，每惓惓於庠序。尤汲汲于俊髦，何取迂愚乃。

加褒拂蓋以鄉閭之非遠且於姓氏而可推東魯大邦
嘗許鄭田之假弓高貴族未忘周烈之餘用書千載之
盟加責一言之袞某敢不紳書夫厚德鞭策其凡才聘
賢士以廣謀既辱長公之薦召陋容而說禮終酬祭酒
之知

賀洪景嚴除內相兼吏書啟

伏審進儀內相仍長中臺夕對金蓮結絲綯而承聖問
晨趨玉笋曳草履而領從官自非兼孔氏之四科安得

被賀公之兩命竊以翰林近華蓋素號恭嚴文昌映紫
薇是司喉舌自昔法天而分職於今弄印以掄才繫國
名儒應時遴選既兼官之俱稱宜上象之先輝恭以某
官學富家傳材優天授徧觀流畧豈徒窮九邱八索之
淵源洞察幾微固已熟六秩五戎之利害早振平臺之
響即符宣室之思譽滿朝端譬之鳳凰芝草以為美瑞
才周世用非儒生文士止有偏長三入修門九遷華貫
帝王之制坦然明白寔揚聞於西垣道德之威成乎安

強亦宣勞於右府式疇久次宜畀殊遷自丞郎而入北
門考院規而無僂由佐貳而陞太宰即選部以有光一
時傳陸贄之詔書多士賴山公之啟事矧如先正久暴
大忠半世龍庭猶握尚書之節浹旬鰲禁莫真學士之
除幸天定者亦能勝人故積善者必有餘慶是開賢曹
來踐世官繼處內廷踵贊皇之盛事並經營伯掩謝氏
之前聞行由供奉之班立邁疑丞之列某雖登門之日
晚辱解榻之意濃賫伐求官方愧旅進於馬牛之走泥

姦伸滯遽回便文於雁鷺之行曾未叙於感綜會來陪
於賀客道古今而譽盛德非以為諛裹章服而揖上官
是乎藉手永言欣感難罄敷陳

賀都總領潔啟

伏審分職地官峙糧天塹九霄觀象使星郎宿之交輝
十道披圖江表淮壩之並總選除甚重倚信可知恭惟
某官學粹而才雄色和而氣勁棲遲遠郡如鳴鶴之處
陰凌厲周行若飛鴻之漸陸屬嚴助厭承明之直頌壽

昌高平糴之才爰輟小銓往臨近甸授田中率既首應
於褒書考績及期更誕頒於寵命內幹左曹之賦外司
土壘之儲錦帳過都諒膺畫接繡衣誇里寧歎夜行方
將宣渴口之威何止實關中之粟某熟誼聲於士論聆
政術於官塗惟今臺治之所臨實許校官之先睹王人
在諸侯之上行覘多儀談士輕萬戶之封幸符夙志其
為閭澤未易敷云

謝除學官啟

四月

二年在泮席既煖而安焉一命登畿壇雖寒而寵矣亟
別驚猿於北壠來窺振鷲於東隸遷不以功望非其素
惟今昔恢崇於學校蓋國家教養於賢能並置明師既
先之以道藝旁分衆職又輔之以規繩或汲汲于作新
或孜孜于掌故將欲德成而行立茲庸事制而曲防不
有儒先孰膺官使如某者立身多難賦性下愚知修能
嫖節之可為願蹇步薄材之難強文史近乎卜祝况未
足於三冬詞賦賢於倡優偶見收于一第倚斷斷而無

技常兀兀以窮年昨誤甄陶外司黷舍身免折腰於五
斗恩容攘臂於三鍾青出于藍居有後生之畏元母尚
白屨為弟子之嘲坐閱歲華行終期成分甘斥鷃翔數
仞之蓬蒿望絕翠蚪檝九閼之膠葛屬伯樂方空於冀
北憐史談獨滯于周南俾綴英遊遂頒號召觀道德於
前後幸陪多士之間計班資之崇卑敢謂百寮之式幸
之至此誰則使然茲蓋伏遇某官格帝勛高求賢志切
已底亨嘉之盛益躬吐握之勤厥亦惟我周王方賴以

寧之多士時則有若伊尹每懷不獲之一夫故賤微弗
忍於遺亡而巧拙或容於雜進某敢不仰銜化育俯策
情媮助國四維固有慚於躬率奉規五等當毋廢於司
存惟曠職之可逃諒酬知其未晚

謝循文林郎啟

六月

繫官于朝誦儒規而未熟積日閱月因選調而稍遷功
歸鑪錘之間感溢瓶甌之外某聞大言則望大利賢者
所以事君小才不離小官衆人所以循職故傑士必登

於要路而庸流皆踵於常途惟其兩適於器能是以各安於分義伏念某地寒身賤才薄志卑學昧淵源如斷港絕潢而焉用文無根柢惟分章摘句以自娛入仕十年蒞官三考稟資罷軟既不能陳力以赴功受性昏蒙又不能彊心而為智以茲斂板何所取材聖圖廣大之秋賢相招延之際逢辰如此忍自投于寂寞之濱摩鈍以湏終不越于拘攣之表誰謂化工之和氣力回冰谷之寒芟已容列屬於學宮更喜陞資於銓部依流平進

固小道之當然較短量長舍大鈞而奚自此蓋伏遇某
官儀刑姬旦左右周成如碩膚之公孫而無狼跋之虞
贊太平之君子而享鳧醫之治上則賞誅有序柄用八
以詔王下焉廢置何心歲歷三而計吏雖名一藝猶玷
七階某敢不念寸進之難戴典成之造無堪而等聾聵
愧莫助於犬鷄畢命而守階墀願常陪於鸞鳳過此以
往未知所裁

上宰執啟

八月

某生而孤露長困飢寒間於鋤耰勉事鉛槧資既鈍
用志復分徒竭謏聞乞無片善嘗欲擁賢門之篲挹瀛
海之波庶幾鍼砭膏肓霑濡枯槁願以人微而迹遠居
然志切而願違豈謂相公矜椎魯之無能念依歸之有
素驟從外服收置中都已數許其望塵更喻令其投贄
歸而三省逮此四旬與其逡巡而干鈇鉞之誅孰若綴
緝而取範模之正用哀骯骹上瀆顯融先索甚榮雖辱
知於相國陳篇是獻懼見斥於宰臣加以楷注盈編重

輕失序曾無一可稱之語難追五不諱之愆屬近遂於
岩瞻重再干於賓贊輒憑尺牘粗述寸誠干冒鈞嚴不
任震懼

謝除館職啟

九月

從國子先生之後六見月書遙集賢小職之間再承天
詔未厭壁池之浴德已容玉海之觀珍茲惟造化之功
深夫豈凡庸之夢到竊以置圖書之府歷代所同號英
雋之纏明時尤重蓋彼徒誇於典籍而此兼貯于人材

雖預宴賦詩待遇幾同於兩禁而進階廢職愛憎或出于一時由居官或不責其有為故流俗竊疑其無用豈知封殖拱把者所以脩明堂之棟寶藏璠璣者所以成清廟之彛但觀累朝傑出之資可見三館養成之效欽惟上聖懋啟中興臺計十金未嘗賁飾府謨羣玉乃獨昂新隆樓傑宇之干霄隱帙奧篇之挿架上追淳化大書開秘閣之碑密契皇唐南向對憲臺之戶譽髦斯士宏達為群必翰林墨客之俊才識竹簡漆書之奇字馬

書五尾能辨其非亥有六身默通其數乃宜當于清望
且不愧于素餐如某者少日百罹長年一第悲粟鍾之
弗泊固當屏跡於民屢悵菊徑之就荒乃復萌心于仕
籍試吏未更於州縣入官輒近於都畿何有聲稱副諸
大夫之深獎居然號召綴百執事之下陳雖農馬之智
專曾犬鷄之効乏所憂被譴反辱見貽矧臺家復古之
秋正館殿入直之日必使上北門之對乃令窺東壁之
光甫下新書封武都之泥紫遽尋舊習忙舉子之槐黃

裘章服以宵興抱繫鉛而晨入餐錢供張固無露索之
持酒思蕪詞幾有倒紉之笑粗彈薄技僅列奏篇凝旒
心恕其空疎當路面稱其拙直河東賦就吹噓力致於
上天溟北風高決起遂逃於控地以凡骨而預飛騰之
數以寡聞而聯是正之曹僥倖既多忸怩亦甚昔劉晏
能譏于朋比而耀卿善属于文詞皆以奇童振茲清職
慨漸衰于蓬髮難遠繼于芳風茲蓋伏遇僕射相公鑪
冶鑄頑雲雷濟物奉行故事方將糠粃于弱翁刊落陳

言每欲網羅于韓愈善類願忠而望賜誠心校短而量
長何取謏涼使參俊又隔弱水者三萬里示以津涯登
瀛洲者十八人進其步武正惟蹇訥莫叙感歲某敢不
稍究六書因推九寫願李邕之一見肯務近功友孔子
之多聞妄希遠器或因涵養之力粗報生成之恩

汪侍御頌德

某官節勁而氣和才全而德稱執憲浸更于三院注懷
方厚于九重以崇論宏議砥柱頽波以大冊高文主盟

吾道眷言孤露猥冒殊知深嘉屢嘆于詞場較藝之中
右挈左提于學省効官之際隔弱水者三萬里示以津
涯登瀛洲者十八人進其步武正惟蹇訥莫叙感藏

洪內翰頌德

某官代襲儒宗望隆邦哲泰山北斗異時天下之三洪
常伯名郎此日臺中之二妙久徊翔于禁路行勵翼于
政塗爰摘甚古之雄文式訪當今之急務隔弱水者三
萬里示以津涯登瀛洲者十八人進其步武遂逃飲墨

來觀汗青

楊內翰頌德

某官間世鴻儒爽邦壽俊草元奏頌真今日之淵雲裁
詔司戎號內廷之頗牧久持從橐行秉政機垂紳窈窕
之禁扉注目盤珊之窘步隔弱水者三萬里示以津涯
登瀛洲者十八人進其步武遂逃飲墨來觀汗青某敢
不稍究六書因推九寫念張籍學書之替永感增懷懲
崔氏美庄之荒終身圖報

試館職謝洪內翰楊內翰小啟 九月

某性資甚鈍學術浸荒比叨號召以試言方懼報聞而
貽誚徘徊既久冒昧以前誰意薰蕕曲憐最品厚以為
禮恕以命題深知潢潦之無根靡責淵源之有考迄緣
假借僅獻狂愚點化工深乞西山之靈藥扶搖勢便度
弱水之迷津人或謂其至榮心敢忘于所自屬齋祠之
未竟加謁制之重踰布武莫違臨文知愧徐輯荒唐之
語別陳感謝之私尚望高明俯垂矜察冒瀆嚴聽伏須

重誅

答徽州巫推官啟

列屬西庠甫接諸儒之武光分東壁遽披四部之文所
慚非騎氣之姿何自綴駢鸞之數忽辱騰緘之貺乃知
推轂之由此蓋伏遇某官質俊而氣和名高而實副稟
秀仙茅之壤素挺奇材泛蓮道院之邦並昌遠業方屬
急賢之旦即頒迅召之書俯眷疲庸嘗承緒論借以揄
揚之助進諸英雋之纏未能一通嘑嘑之言少伸謝臆

願乃三復翩翩之記增激感悰惟誓珍藏以為永好

謝戶部張侍郎舉自代啟

書林退縮苟安無似之蹤禁路推先猥上不如之奏蓋
高誼曲敦於先契忘孤生難繼于後塵遂以名聞駭于
衆論竊以九官相遜始自虞廷三日舉知盛于唐世然
非事業功名之相亞與夫輩流位序之非遙故當授職
之初可致讓能之義乃如今日允異前聞明公以絕識
環材而某性資甚下明公以老成宿望而某齒爵甚卑


竊伏三思殆無一可特以諸父瞻承之舊畀之片言獎借之榮雖上臣事君以人不暇賢愚之間然他日居我此位實慚期待之優此蓋伏遇某官厚德端朝精心照理粒民敷教方將蕪稷契之功富國強兵寧復用管商之策行絲卿貳交秉政機欲助承歸厚之風故垂眷甚涼之品廣陽秋于皮裏所憂仰累乎否臧薦伏獵于省中更恐誤知其學術某敢不銘箴至意鞭策凡才未四十而為丞郎決無此望從三千而為弟子勉在下風

賀汪參政啟

伏承竣事行營奮庸近弼徐方不回而歸休父酬暮年
節制之功袞職有闕而補樊侯贊萬世保衡之業宸心
所屬民譽則同恭惟某官惠和忠肅而竭之以誠敏達
清明而篤之以學望其風采凜名世之巨材發以詞章
驚前修之逸駕惟是規恢之大固宜進用之難天方佑
於我家帝親知其國士拔之冊府付以憲臺凡上前獻
替之嘉謨皆天下安危之至計適文王有獫狁之難正

切焦勞顧李愬帥鄧隨之兵尚虛統督一言辰告千里
暑行雖順逆不同敵有當亡之理然強羸相絕我無必
勝之資况驅荆襄不教之民中控吳蜀相望之勢衆方
烏合敵則鷓張甲戰而乙乃還北攻而東已急指麾諸
將激勵羣豪赤幟二千亟歸于韓信青兵三萬幾獲於
左賢羣敵由是以大奔故地乘時而漸復人惟求舊既
望實之久孚賞不踰時亦勲庸之當報茲惟古誼抑有
成謨盜滅甘陵彥博入登于宰席使來西夏仲淹歸贊

於樞庭不圖仁祖之前聞乃至紹興而復見某辱知甚
厚在治有初上馬從軍揣己昔慚于不武懷鉛抱槧期
公力致于不平欣頌之懷編摩莫盡



文忠集卷二十二

欽定四庫全書

集部

文忠集卷二十三
四

詳校官庶吉士_臣李傅熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣于希賢

欽定四庫全書

文忠集卷三十三

省齋文藁二十三

宋 周必大 撰

啟

謝改官啟

紹興三十一年五月

黃本讎書已濫巾於秘府赤墀拜秩更寓直於審官省
公狀以幾如承命書而愧甚竊以陞遷之典莫謹於聖
朝考覈之規具存于文部自仁祖肇增于薦牘而元豐

大正於官名法既一成時無他覲惟入服王畿之采乃
獨殊選調之人既不假于薦揚復稍裁其考任以此待
英髦之士誰曰不然如其容嵬瑣之流斯為過矣伏念
某掖衣自奮襪線何施欲扞塞垂邊初乏蹶張之勇將
圖功慮事顧無心計之優甘為盛世之腐儒勉蹈古人
之陳跡岩堯雁塔昔聯千佛之名窈窕麟臺今接羣仙
之武猗無薄技祇有厚顏鷄躍蓬蒿竊自安其小大皂
飛渤澥迄何係于少多茲參滿歲之文越進在京之秩

雖云極陋敢昧攸歸此蓋伏遇僕射相公作輔簡乎帝
心奮庸孚乎人望有伊尹之一德上格皇天惟成周之
大寧旁求多士肆容平進例獲次升某敢不仰服官榮
俯安職守念無功之可錄幸一進階誦有德之必醕願
三致意過此以往未不知所裁

史院上提舉僕射相公啟

共承某官以經國之謀贊視師之舉君臣協德靡辭臣
薄之勞夷夏歸心佇獲廓清之應某自惟庸懦辱在屬

僚仰睇篆車莫備揚揚之御暫違赤烏徒勞赫赫之瞻
方屬祁寒敢忘善頌願厚鼎茵之輔益綏福履之和

史院上提舉僕射相公啟

紹興三十二年

驟違英袞俄易芳年自惟托迹於甄陶寧不傾心于夙
夜今者杓攜龍角日會媿訾當國家正翔遠布之時實
輔相年德加新之際中外舉勤于善頌神明必介于殊
祥某既未容陪賓客之後塵又不敢修慶賀之常禮姑
因尺牘粗述寸誠和氣熙春賴宗工之鈞播東風應律

知氛祲之冰消迎拜尚遙坐馳更切冀慎鼎茵之節式
符夷夏之瞻

除察官回福州王尚書啟

讎四部之書久迷魚魯糾六曹之務驟玷龍光揆庸劣
以無堪殆夤緣之有自此蓋伏遇某官望隆壽俊世號
儒宗鎮撫藩方屢紀循良之績論思禁路居多仁義之
言既班聯居近侍之先且闕閱在諸公之上茲逢新政
乃眷舊人竚秉執於事樞以輯寧於夷夏某追惟先父

嘗掇魏科未容布武于前榮何敢通名于執訊不圖謙
德遠賜柔函選擢于公朝已踰其分勤褒稱于耆德
益重厥愆惴惴在中云云奚盡

回新邵州李守元老啟

分安冊府都忘歲月之遷恩徒憲臺大懼寵靈之過衆
方譏笑公則吹噓載窺春添之華更切夏畦之病恭惟
某官兩朝大丞相之子今日南諸侯之良發以儒猷知
傳家之有自見諸政術喜繼美之無忘去思甫切于清

湘因任再勤于鄰壤兩邦父老雖渴見于朱輪九陸班
聯竚歸持於紫橐某自惟晚輩尚識諸昆慕巨室之多
賢矧叨契好歸靈光之獨在彌想儀刑方承家國之榮
宜適鼎茵之節乃如悃悞未易指陳

回吉州張判官啟

披風未遂蓋或有時注記不先豈為無罪敢謂謙冲之
至遠勤翰墨之臨使知託契之所從加以噓枯之過厚
開緘三復省己多慙恭惟某官義概根心儒猷飾吏仕

將行志願何擇於崇卑才遇可為初不論于劇易參釐
羣政藹著氓謠少須歲月之間即步雲霄之上某遐瞻
幕府阻預英遊揚善推賢雖抱惓惓之意挾山起海第
憂憂憂之難愧仰蕪懷喻言莫盡

答平江沈侍郎介啟

內出左符起臨右輔吏民朝見條教夕聞恭惟某官備
九德以持躬堅寸心而許國修門三入進以正而甚榮
諫匭萬言去未幾而輒驗茲逢新政乃眷舊人親頒一

札之書首置諸侯之選誅狐狸于七日士知繩墨之難
踰汰雁鶩者百曹民喜銘簞之坐絕袞方待補公盍來
歸某久遠賓榮常依德宇長箋例拜驚看春蒸之華盛
禮逆施愧甚夏畦之病其為感激豈易數云

答葉伯益起啟

二年抱繫無補公家六察聯華更慙僉論推本叨踰之
自深知假借之私此蓋伏遇某官學擅儒宗望隆邦雋
聲猷日茂親承太上之知議論風生高出羣公之右久

秉屢書之筆行真三字之除胡為厭承明之廬顧乃在
諸侯之選載疇治最雖旋膺臨遣之榮仰揆宸衷恐即
有名歸之寵遂由禁路進貳政途某迹遠門墻心懷德
誼曾尺書之未達已華翰之先臨愧荷交深編摩莫盡

除左史答湖守陳阜卿啟

分察南臺初無一善參華左掖豈有三辰壓上命以欽
承酌輿言而內愧此蓋伏遇某官望隆邦哲才號吏師
搢紳之所範模旒宸之所簡注河潤九里可令枯朽之

含滋袞袞一言坐使駑駘之增價遂容佔畢猥預書言
尺牘未馳正以京塵之汨沒長牋見及足知郡政之優
游感激在中敷云莫盡

答洪總領适啟

裏行豸列拆襪線以無庸侍立螭頭結絢絲而有愧靜
言所自推本乃知此蓋伏遇某官哲以爽邦德惟輔世
并包衆善非偏文士之長恢廓宏圖可大賢人之業眷
惟三傑實萃一門叔仲飛騰已迭居於載筆聖神纂紹

宜首趣於覲圭屬邊徼之尚驚願軍儲之尤重與其屈
張蒼而為柱下之史孰若煩蕭相而餉關中之師致此
妄庸暫茲承攝未展事賢之禮俄披執訊之書讀英詞
于方冊之間師承惟密箴尺牘于巾箱之內榮幸則深
其在感悚曷勝言喻

回江東葉憲謙亨啟

伏審親簡睿知進聯禁直下璽書於劇部固知使指之
增華記閣老於西臺猶恨寵章之未盡願私心之所喜

以公道之浸開竊惟士大夫不吐剛鮮聞近日部使者不
案吏蓋亦成風上方力變於情媮公則首膺於褒擢共
惟某官學貫六籍文成一家以言語侍從之流任原隰
馳驅之寄三尺從事何疆禦之足云六條察州聞奸蔽
而輒舉當宁深嘉其諒直滿朝爭誦於澄清望貽謨之
之門茲焉通籍直玉堂之殿行矣摘文某阻濶茵憑瞻
依蕩輔向由尺牘畧寓於歡悰逮辱長牋殊深於感臆
其如悃悞豈易敷陳

回洪師鄧直閣柞啟

祇奉詔除洊膺闡制任一道兵民之責寬九重宵旰之憂共惟某官重厚而疏明端方而樂易學皆有為不為況古之空言政本無私每著裕民之實效屢奏藩方之最進參箴室之華令修庭戶之間流風可考身在江湖之上雅志難忘即歸踐於禁途以茂摠於賢蘊某方圖展慶先辱摛詞仰謙德之勤渠激懦衷而悅懌

奉祠歸廬陵答吉水羅朝請斐恭啟

隆興元年

月旦評高服膺久矣風舟山遠極目悵然茲置散以來
歸幸親仁之浸邇恭惟某官以旁搜遠紹之學濟中坦
外莊之資冠映儒林最為先達周旋仕路亦號老成夫
何進取之廉猶緩凝嚴之直朝多虛位公可騰裝某弛
擔云初達函未果隔千里而共明月方期適兩間人之
心烹雙魚而有素書乃首勤十從事之貺其為感愧未
易數云

答安福路宰植啟

族大而才流聞惟舊政優而近渴見益深願方從山鹿
之游未暇往雲鴻之記何高情之異甚屈妙語以先之
恭惟某官躬受雋明世傳清白凡人所難而公獨易蓋
才力之無窮其譽滋著而位未光特主知之有待政已
成于雲土寵即荷於天衢某竦聽合符首期傾蓋適屬
三秋之杪尚調六氣之和

賀湯榮公赴召啟

召還衮烏對掌鈞樞升之賜位之尊昨以諸公之貴雖

王曾再入姑循景祐之舊章而曹相定封實處鄴侯之前列制書一下歡頌四馳某聞時不易然乃鏃基之當守歲如晚矣何觥飲之能須若置棋自有後先而芸草必瞻內外一失其措孰成厥功憶敗亡之敵將歸方戰守之機未決獨公抗疏于居留之際謂國失誤于閒暇之時曲突徙薪當日無聞於息澤震風凌雨後來知託於幘幪恭惟某官絕識鄰幾孤忠拔萃出緒餘而應務人莫能名竭悃幅以事君天其知我蚤恢隆於相業久

慰愜于民瞻事有從違時存用舍挺然勁節自不改于
雪霜曾是浮雲果何傷於日月逮茲委重初不辭難言
念比年適逢多故投非越人不足以治衆疾力非烏獲
不足以勝千鈞然而廷議靡同敵情叵測師已疲而解
嚴尚遠民既困而趣辦方興明良都俞固屬一堂之默
運疏附奔走亦資百職之贊成顧堯堯者每嘆難全而
碌碌者豈能成事封大夫于即墨毀已日聞補袞職於
仲山愛而誰助正資碩望力制頽風照之以著龜之明

何邦巫之能惑鎮之以山嶽之重俾國勢之漸尊庶幾
期年馴致大治微管仲其左衽矣豈徒銷猾夏之憂用
仲尼為東周乎且復有變夷之望其一從陪侍即辱加
憐方幽屏於田間乃遜傳於典策向也蒙此爵位本出
將軍之門今茲壁言之宮牆不見宗廟之美但同野老永
託化工

又賀再轉左僕射封慶國公啟

冊告大廷位升上宰持兩朝之魁柄得君欣如彼之專

易西土之公主積善故有餘之慶股肱既喜藜藿何憂
蓋聞收功百世者必存先定之規揆策未形者寧免不
齊之口况拯溺救焚之際豈談河畫餅之時謀夫孔多
當有執其咎者幾事不密得毋害於成乎觀姬公之輔
周暨子產之相鄭或動流言於四國或紛輿誦於一年
使無堅決自信之心而作因循苟且之計京何時而奠
枕鄙何日而有章宜吾君念昔人慮始之艱求彼相圖
今者折衝之要其誰有一德之享繫我不二心之臣才

之全而識之精既越拘攣之表任之重而息之厚遂居
輔佐之先雖云舊席之遷時乃首廳之轉恭惟僕射相
公舜廷弼直魯國儒真再翊萬幾之繁浸成期月之化
論精神之運固難形容考設施之方或許誦說蓋鎮物
重踰于鼎鼐而決疑明甚于著龜義在敬王故陳謨而
至切美存報上故任怨而弗辭惜邦財則力贊儉圖裕
民力則屢頒寬令登畿一命悉儲可用之材授鉞諸軍
潛易不能之將內修若此入告可知必將康兆民以蹈

成湯之蹤格上帝以率伊尹之職期天人之協應乘夷
夏之僭來一舉而空朔庭大漢之威以振五遷而治商
亳先王之烈其從此君臣素定之經綸豈中外能窺其
彷彿及功成而效白自心駭而神驚某十五年陶冶之
中二千里門墻之遠化工之蘇羣槁其如遇閨之楊大
匠之無棄材自嘆難雕之木但深欣躍莫寫依歸

與趙提舉察院渙啟

從童子六七人於鄉校已觀詢度之駟負才名三十年

於外臺未釋澄清之轡豈聖主顧憂于南土抑明公心
樂於舊遊雖慰此民其如公論恭惟某官清真表于當
世問學窮于古人居憲府則分察之譽高定明堂則諸
儒之議屈歷考貞元之士大用已多獨惟魯國之儒外
庸屢試間嘗頒于璽召顧猶待于瓜時中外合辭皆嘆
後薪之居上謀猷趣告即聞夜席之盡前某久此庇身
幾于閱世帶不疑之櫪具尚遠顏辭達殷浩之空函所
憂謬誤其如依嚮未易敷云

與趙贛州公稱啟

舊聞暴公子如想見于古人願識韓荊州蓋屢哦于斯
語今依庇不遙于數舍豈懷賢敢廢於一緘恭惟某官
學術足以康時威名長于治郡方蠆尾搖毒之後親平
贛水之瘡痍暨佛狸窺江之秋力固朱方之屏蔽久勤
批卻姑聽凝香紛然十邑之兒童爭迎吾父壯矣鬱孤
之臺榭重得主盟願方倚於崇疆諒難稽于王覲某狎
漁樵於故里在封域之下流日遲浮鷁之遄歸首望匿

犀而雅拜其為瞻頌實倍等倫

答林教授仲熊啟

數父執於慈恩之塔踈若晨星訪者英於通德之鄉凜
然霜幹雖千里猶當命駕豈同州而廢馳辭恭惟某官
儒行配乎先民詩名聞於四海一行作吏非無意于致
君再轉為丞乃不容于當路惟薰醲浸涵而道彌廣故
敲撼挫捩而身益尊盍不歸來適逢西伯之善養輒思
免去俄遂曼容之自修其廉清可以師鄉問其進退可

以勵風俗是為全美寧待諛言願方注想于九重看即
召陪于五叟某遙深聞足之喜適困采薪之憂想鳩杖
之從容獨妨先覩望龍門之友業敬卜後期區區所懷
喋喋徒費

答永豐張丞茂遜啟

伏審遠銜王命參治邑民喜動閭閻威行雁鷺共惟某
官地望華顯天資雋明再為丞而處之恬然一得召則
進也銳矣迨茲暇日及彼同僚緡澹巖之遺書大明家

學式瀧岡之故壠少慰士心非俗吏之能為捨名流而
誰望未遑往記先辱示音俯深感愧之懷更切瞻承之
願

答武岡趙知軍伯璋啟

時稱虎榜恍驚四紀之周齒以雁行夢想兩家之盛雖
南北東西之相望而生死契濶之不同陟彼岵以興悲
偶存餘息仰高山而結戀豈在他門但知轡蓋之守邊
未省駉駉之稅駕豈謂先君之友曲憐不肖之孤屈輩

流而賜華緘感今昔而陳至契載窺鄭重增激主臣恭
惟某官清醇忠厚秉之天問學才華傳于世早陪雋軌
擅政駿之聲名安少仕途養閒平之德望佐郡嘗聞于
善教為邦不愧于古人大夫皆曰賢已記中書之籍公
卿選所表即頒內史之方某及茲俟駕之時願作執鞭
之計里仁為美况當鷄犬之相聞父黨無容何必雉居
而後見春陽駘蕩玉體冲和期加厚于寢羞用下符于

頌願

回永州葉守程啟

隆興二年

齒縉紳於闕下孰觀少尹之威儀被襪禎于田間逖聽
大邦之謠頌屬長嬴之甫屆諒福履之交綏恭惟某官
學有源流才堪盤錯早濟石林之美浸承文陛之知差
擇登畿贊京兆三王之政選掄出鎮開零陵萬石之祥
惟猷謨左右之具宜故中外褒遷之甚寵承宣屬耳威
望隱然必酬督刺之榮誰出君侯之右某二年執別千
里傾風未能准記於江潭徒想凝香於燕寢敢期謙厚

猶念衰窮十人分治於私書絕知敏手一介遠勤于行
李深愧高情惟感激之在中非指陳之可喻

回洪推官燿啟

考氏族于故家知冠江東之籍事鋤犁于舊隱喜逢慕
下之賢雖車蓋之未傾已心旌之先曳伏惟某官才猷
夙蘊儒雅自將應劇繁若閒暇之時居州縣無淹留之
歎武昌之號多士正由佐吏之才渤海之為水衡寧後
功曹之拜某未遑削牘先辱飛緘坐深愧感之懷行遂

瞻承之志

與龔守直閣濤啟

伏審初反牙璋重分銀菟二千石真秩視使者以為優
三百里諸侯豈炎方之可擬主知異甚民誦歡然恭惟
某官規恢難以小知智畧期于大用邊塵瀕洞猶長嘯
以折衝嶺祲微茫宜望風而罷警申錫自天之寵榮疏
易地之恩豈止疇庸是將趣覲蓋盜興東海而勝之使
及兵散潢池則龔遂歸况漢廷方闕于公卿諒唐制先

求於督刺某世為北客今附編氓清德有餘豈敢奉一
盂之水惠心所及但當賡五袴之歌欣忭于中敷宣罔
既

與葛守判院主象啟

伏審帝眷樂郊詔除循吏八邑之民有恃羣州之楷在
斯恭惟某官才德兼優人門並妙仕路淹回久矣衆所
嘆咨宸心特達知之親加擢用斗野不離于一道星屏
就駕於兩輻矧茲調守之頻展矣願憂之切惟弄印靡

輕于畀付故懷章尤極于恩榮師帥賢則主德宣姑試
承流之手治理効則璽書勉行參增秩之規某掃軌偷
安灌園自給竊寓公之禮貌敢並他人觀前輩之風流
尚諧素志其為欣懌未易敷云

與趙守直閣不溢啟

伏審帝眷樂郊詔除良牧八邑之民有恃羣州之楷在
斯恭惟某官忠恕得于天資才猷周于世用丁年官達
由問學之著聞頻歲外遷以循良而表見向膺三接入

預九卿羽儀天朝方資祭酒之舊德屏蔽王室復賴維
城之雋功惟出處之俱宜非親賢而孰稱既屢書於課
最即高步於禁途某掃軌偷安灌園自給竊寓公之禮
貌敢並他人觀前輩之風流尚諧素志其為欣懌未易
敷云

謝生日詩詞啟

乾道元年

已孤多難欠一死以無求不學少文羨久生而安用豈
謂某官因錫名之初度特取義于斷章驟觀玉振以金

相徐讀文從而字順曳繼以歌商頌慚無曾子之聲讀
詩而至蓼莪空有王哀之涕敬箴篋衍永賁子孫

答胡邦衡啟

某竊惟三有樂之君子俱存為先四無告之窮民幼孤
為重自憐薄命實感格言每值生朝不知死所對鍾粟
而養弗洎清集則那聞蓼莪而涕自流妙謳何有豈謂
某官以貴下賤以賢下愚饋雙玉瓶屈千金諾更推孔
子之忠恕歷叙姬公之太平清談疊疊而不窮雖歎筆

端之口華緒遙遙之大遠恐傷月旦之評然念無言不
醕有倡斯和載維鼎族時乃相門與其借異代以禱祈
曷若即聖朝而揚推文恭之遇仁祖僅登二府之班全
夫之事泰陵止轄中臺之政孰云吾相乃在我公况虛
左以踰時豈居東之可久堤沙一築甌脫四空二百載
而中天適符興運三千臣而同德永師羣工入衣冠盛
世之圖冠宰相世系之表茲為公論非曰私言云云

答新江東提刑趙直閣公稱啟

伏審榮易皇華顯趨嚴召循良進擢慶賞公明恭惟某
官篤學恥務空言誠心樂施實惠踐揚三紀未嘗興歎
於積薪鎮撫數州所至必封于嘉木再臨贛水尤著治
聲衮冕思其姓名搢紳誦其留滯有謀猷乃順于外况
宣布之久勤非仁義不陳于前宜論思之是賴由此邁
魯邦之兩社豈惟陪舜牧之四朝某昔望虎頭之堞而
身莫前今瞻鷓首之颿而足不進河雖廣矣寧無一葦
之可杭風輒引之坐覺三山之頃遠方徘徊而挾刺蓋

繾綣以貽書但深感悵之懷莫究願言之素

與郭贛州契敷啟

占風濤之色方期鷁首之上征聞道路之言乃審騎頭
之端邁失殆同于交臂悔何及于噬臍遙想檐帷俶開
幕府民安新政神介多祥恭惟某官問學家傳直方自
信明足以知人之疾苦知足以摘吏之奸欺間被異息
擢臨近輔方善教得民而報上會庸夫挾貴以察州暫
汨讒波罷季布河東之召俄回宸渥復子松雁門之跼

眷此雄藩足施敏手政倘成于五月缺定補于九卿某
方引分以歸耕豈馳辭而為佞因輿誦之如此恃交情
而有云惟意之勤非言可喻

答李監酒次魚啟

戲提健筆優取舊羶波瀾之獨老成豈應遺恨盡手而
看前輩果復擅場吉語播揚鄉評稱愜恭惟某官體兼
四業用足三冬自合丁年馳駿馬而就熟路胡為半世
著美名而負屈稱蓋厚積者可適南溟而晚成者始為

大器必也年高而德劬自然齒宿而意新舉筦庫之士
七十家無愧外臺之歲貢上公車之書三千牘即聞廣
殿之臚傳步武之亨權輿於此某傾風自昔披贄有初
秋鶚在天歎老先生之逸興春風得意想前進士之後
遊既覺心降遂忘辭費

答李本中保義李宜中解元啟

弟兄獻藝臺府登名方輜車分道而行各當一面逮吉
語同時而至實允庶言某人勵志精勤凝姿溫裕既擅

通經之學亦高作賦之才自昔家齊爽已推於二惠竭
從入洛價不數於三張負此雋聲難乎嘉遯用公山而
擢正禮前後適同舉侯喜而知雲長衣冠增勸行唱廷
中之第歸為膝下之榮某特枉高軒寵貽巨軸雖雖雁
序已觀秋漢之聯飛鞞鞞棣華更篋春郊之並秀其為
欣頌未易名言

答郭贛州賀冬啟

候舒長之日知太平之無愆瞻迎送之雲驗循良之有

助恭惟某官明起龜蔡政捷蒲盧開藩歲月之幾何闔
境歌謠之籍甚順迎陽復參媿時和豈徒榮祿之具膺
蓋亦嘉祥之總集登觀臺於魯國姑追視朔之儀欵圓
陞於周郊終贊事天之禮某欣逢小至仰祝大來體號
五雲愧難當于華翰令休一笑悵莫奉于清歡

回南安祝知軍深啟

漁竿遠去久浪迹於烟波騎吏實來辱寄聲于嶽牧惟
未忘一日之雅故不吝五雲之書於以鳴謙亦將敦薄

恭惟某官儒雅漢之循吏惠柔周之良翰濟民以政而
何事乘輿摘伏以明而豈資吏鉅平心共理有衆率孚
紛多譽之傳聞亶四聰之簡在郡守者民之帥姑紆組
以少留王朝者俊之廷即牽絲而入侍某傾心盛德屈
指召期逢驛使而寄嶺梅意殆踰于縞紵識歸舟而辨
江樹日篋俟于檝迎

答士人謝解啟

伏審命鄉論秀士升之司徒羣吏獻賢書登于天府聽

月評之無間知秋賦之有光恭惟解元先輩毓質粹醇
降才高劭學專為己期為君子之儒仕欲及時聊應主
司之試眷言茲土實異他邦家稷契而人咎繇下視士
鄉之十五德淵騫而文游夏倍蓰門弟之三千惟選于
衆以甚艱則拔其尤而可想麗矣騫雲之思緒壯哉倒
峽之詞源鷲在秋天已播少雙之譽鶯遷春谷即聞第
一之傳某幸戀榮名猥膺盛禮憶盤姍之舊步尚覺槐
忙誦璀璨之新篇不勝草偃感由中積意詎言傳

漢代口述人姓名

文書號碼

頁數

文忠集卷二十三

欽定四庫全書

文忠集卷二十四

省齊文彙二十四

宋 周必大 撰

啟

回鄆贛州賀正啟

乾道二年

天行有信養生開闢而為春神聽無私正直靖共而獲
福豈謠頌已騰於四境而壽祺不介于三朝恭惟某官
剛方足以發晉樽辨博足以重漢席仁心素著何待放

邯鄲之鳩智慮所加猶能覆荊州之雪一吹暖律盡滌
凍塗萃衆美以在茲紛多祥其焉徃行陪劍履直上星
辰某甫治書郵已勤驛使想東方之千騎目斷班春被
尺素於雙魚愧同畦夏

再任宮觀謝宰執啟

三年去國夢斷朝參再命奉祠喜窺堂帖踪跡已沉于
農畝姓名尚錄於朝廷雖至冥頑寧忘荷戴伏念某稟
資極陋殖學不豐本期久次于讎書敢望驟升于載筆

冠沐猴於仗下實愧水官齒路馬於君前常憂山野身
非不遇心自弗安仰繫恤隱之施俯遂投閒之請年豐
令暖無嘆於飢寒日邁月征有慚于夙夜曾更時之未
久而寵任之已加博矣惠施不忍偏慳於數子大哉鈞
播固應塊北於無垠此蓋伏遇某官魯國儒真舜廷弼
直提兩地兵民之柄贊中天神聖之期三握髮以旁招
畢來俊傑一禿翁而退處猶被恩榮自憐流落之餘倍
感提撕之意某敢不內循尸素圖稱龐鴻司存雨露之

邊難追朝蹟身在江湖之上但祝帝齡

答錢倅五月旦問候啟

風土記時甫應濯枝之雨禮經記候喜來登黍之農觀
四序之無愆知貳車之有道恭惟某官履茲長夏介爾
多祥忠恕所加縱重囚于牢戶濡調不爽斬陰木于山
虞即歸象日之畿大放景風之賞亶惟公論宥獨私誠
某密托蔭庥載逢穀旦莫綴賀賓之後每勤筮記之先
其在感戴靡容殫叙

回湖南提刑直閣王郎中彥洪啟

資弭一方寵加八使進寓金闈之直實增玉節之華制
命流傳臣工聳動恭惟某官擅山甫將明之美兼翁歸
文武之才早列爽鳩橫飛於朝右暫提虓虎直指于湘
中殲彼渠魁屈其羣醜爵賞光於當世功名著于景鐘
徐國濯征已賴整師之皇父淮夷攸服行歸淑問之臯
陶某所謁追班久陪步武春銓較藝嘗欵笑談逮華翰
之來臨恍舊遊之似夢適聞褒詔倍激懼悚

答生日詩啟

誦哀父母之詩每感左懸之日讀寡兄弟之禮况當右
拱之時曾未釋于端憂敢與聞于贊喜伏蒙某官噓枯
意重激潤才清借仲尼仁者之褒發吉甫穆如之詠皇
揆余於初度迄無內美之可言武請受其卒章但有中
心之永佩

與洪景盧啟

謫墮亡何豈舊遊之敢記傳聞有喜謂新將之當來念

受屢幸忝于為氓則維梓敢忘于必敬輒理久焚之硯
載通執訊之書恭惟某官德配淵騫文規姚姒草紹興
之詔家有其書起大雅之門今無此比自合徑參於國秉
胡為尚攷於民功千里傾風二年引領叔度之來何暮
既騰襦袴之歌君嚴之行勿遲又冀事樞之執某側聞
斯語為酌其中柔此萬邦少展甫申之惠間于兩社即
追季孟之踪既容陪凝香森戟之笑談復可乞賸馥殘
膏于造化悃悃所底英晤必孚

回新進士啟

孫逢辰
陳邦

羅全畧
陳夢才

徐徽
劉濬

李克

龍飛擢第鳳詔除官親鄙輝光士心慰愜於穆文明之
代有嚴俊造之科三歲下詔則與郊見天地之理均萬
乘臨軒則與冊拜公孤之儀等况今皇帝垂唐虞之問
咨實學而匪事虛文宜子大夫以晁董之才貢昌言而
非徒干祿兩相求而適值一被選則為榮某官天之降
衷固殊學以為己尤至凡著在簡編而甚富皆措諸事

業而可行宜其出谷敏于遷喬取青易于拾芥俊傑出
我門下豈惟座主之榮英雄入我壙中想見天顏之喜
載仰儒先之蘊詎專科甲之求惟聖朝重此以求名世
之英故志士假之而作致君之路尚據賢業迄副鄉評
某僻處郊關猥勤鞭馭瞻泰定之字固應輕萬戶之侯
味春容之篇殆類鬻九戎之髡其為欣感未易敷陳

回郭縣尉有憑啟

伏承龍飛乾五象近魁三聲氣相求將入風雲之會衣

冠不乏實增鄉里之榮蓋聞所難逢者茲謂昌期不可
掩者其惟宿學故運有千齡之俟而金須百鍊之精方
武帝初年求賢良之奇士宜孔門高弟在德行之巍科
某官造道醇深績文瓌麗仁先難而後獲農力穡而有
秋主司不能信人久乏昌黎之薦士天子自為座主適
逢唐室之右文靡需南省之蘭自折東堂之桂賦五色
而遺矣初何病於李程讀子虛而善之宜深嘉于司馬
已膺親擢即慶超遷某特枉新篇曲敦舊契異時場屋

雖容揚糝之在前他日宦遊何害積薪之居上併陳善
頌以答好謙

與錢吉州瑞英啟

管庫中都早識名郎之面躬耕北陌將依賢牧之仁念
睽違一紀之餘乃庇覆二天之下逖聞犯輶遠劇搖旌
恭惟某官德度粹溫儒猷通敏既將相侯王之有種亦
文章政事之傳家締睿主之深知畀价藩之重寄仁風
揚婺預多必偃之民惠雨沾吳行廣幘幪之潤遂由熊

軾歸從鷄翹茲朝士之公言非邦人之諂語某遲聞新政快滌塵顏一薤置前豈敢助漢陽之治三篇轉上或能興益部之歌欣頌于中敷陳罔既

戲答錢倅

某比貪求益輒復言詩辱誨答之勤渠省愚衷而愧慙恭惟甲族實冠聖朝系出真王世為右戚吳山裏繡帳何止於銷金秦地吹簫斟何須於低唱殊非筆誤端是寫真既蒙叩鄙之言輒效解嘲之對

回添差通判趙朝議不韋啟

視秩列卿自應典郡興懷先壟力請監州雖有榮觀若
無公事諒假潁川之軾以光京兆之阡恭惟某官才華
賀白之儔德望間平之亞飛騰久矣更歷三輔之元僚
議論卓然常備十連之上介將受維城之寄暫榮展墓
之歸地置萬家已驗宏模于韓信木成連理即觀瑞應
于蔡邕某方治書郵先勤牋敬託治中之庇豈惟日見
於老成從方外之遊尚冀時親于並論

回李世南秀才 七月五日

試倚馬之言昔已披于巨軸賦高軒之過今復誦于新
篇愧無尺寸之長虛辱再三之貺身方抱拙何捷徑之
敢知分合投閒于提衡乎何與但珍瓊玖永賁巾箱

回蔡吉州洸啟 乾道三年

河橋三歲共聽朝鷄江國一麾行逢畫鹿念昔卜隣之
好乃今託庇之階其在懽悰豈同常品恭惟某官慶厯
諫臣之後中興廷尉之甥問學有承殆曾門之是似慈

祥無害豈宅相之不如適丁重外之時遂作請先之計
少勤敏政別奉除書歷帥守而造侍班蓋聖朝之新制
選循良而補鄉闕亦神漢之舊規士無間言公有愜志
某比緣簿劇稍緩馳詞聞千騎之鼎來想前馳而夢去
芳春紀孟和氣應時願于啟處之間益以保綏之厚

答永豐魏宰希文啟

命車三徑誰願陸沉占吏百函獨勤泛愛拭病眸而快
讀積感臆以中藏伏惟某官蘊撥煩理劇之才得學道

愛人之旨分竹符于炎嶠嘗布息綸執穀璧于江鄉乃
迂塗輟雖百里少卑于千里而近邦殊勝于遠邦與其
國叢爾而膺幡蓋之名孰若縣壯哉而享絃歌之樂况
易流于聲實諒滋速於褒嘉尚養頤龜用蕃晉馬惟瞻
期之至切非宣寫之能周

除南劍答雷州蕭守輦啟

乾道四年

投閒歲久敢嗟太史之留起廢恩深辱在諸侯之選念
戍期之尚遠通筦記以未遑豈謂執謙特形贊喜恭惟

某官才猷天稟學問躬行早溥詡于聲華駸發舒于事
業羣公交薦多績日宣嶺海分麾籍甚桂林之伯雲山
動興優哉桐栢之祠惟承宣之譽素高且睿哲之知彌
厚好無事職豈容遠慕于杜欽喜有良翰正恐近求于
申伯行趨迅召立上要津某竦聽辦嚴首圖廷勞惟瞻
祈之至切非頌述之能周

答郭尉有憑羅司戶全畧啟

六年退屏蹟收供奉之班一命俯加名玷附庸之國雖

上聖匿瑕之賜亦諸賢推轂之私恭惟某官厚德好謙
懿文行遠篤嘒枯之雅意擣激潤之芳詞何取陳人遠
貽新語念放浪山林之久詎堪雍容輻蓋之間矧四體
可勤猶乏在前之知畧豈二毛已受敢思治郡之功名
幸尚遠于戍期當徐伸于祠請仰酬嘉貺聊布忱言

謝生日詩詞啟

鄭伯驚姜載感寤生之日僖公保魯敢當純嘏之詞方
一舉足而懷罔極之悲乃九頓首而拜非常之惠假壽

鄉之新說奏文圖之奇才儉異闕型真獲太牢之饋喻
同稼穡正資一溉之功翰墨易殫感銘難既

答胡邦衡啟

胡大書魯太師樂為予生日壽乃用其啟中語戲答

言念生以敦牂首寧大有月惟夷則物豈無傷正爾待
衰居然永感豈謂屈金殿論思之手揮玉堂勁健之毫
比之衛賢者之官寵以魯太師之樂秉籥翟而錫公爵
雖不足以事王執同律以聽軍聲願敢忘于詔告仰承
嘉命來賁孤踪其在感悚并需面叙

答廖英州遜啟

引分投閒久安農畔叨恩起廢適在士鄉既未臨洗印
之期難驟展事賢之禮音郵遠暨感臆中深恭惟某官
夙蘊儒猷素隆士譽景行了翁之抗節服膺中立之存
誠比佐藩條適逢寇警繕甲兵具卒乘既坐絕于蔓滋
出幕府持旌麾曾未移於桑蔭若時嘉績方簡睿衷矧
頒一札之書進補九卿之缺某日遲取道首冀披風惟
瞻邈之甚勤非指陳之可喻

回梁提刑竑甫啟

十月

問舍初年尚記尊史君之嘉惠躬耕末路喜聞新使者
之先聲謂因肆覲而必留故緩雙緘而未遣逮茲拭目
寧不噬臍恭惟提刑判院出相門而敦寒素之風富天
分而勵精勤之搵形于德業蓋端良溫厚而有餘發以
詞章宜瞻蔚瑰奇而絕擬允矣克全于衆善胡為屢乞
於外庸茲由江介之封早賜先公之履十城父老歌西
平有子之詩八境山川留召伯甘棠之化姑慰戎昭之

望更增臺治之光何待政成即陪禁直某方樂廢屨之
晝掩莫知英蕩之宵馳未瞻負弩之驅已辱夢刀之慶
感慚斯甚宣寫奚周

回得解士人啟

皎皎白駒而在彼空谷久聞鄉譽之高呦呦鹿鳴而示
我周行果預計偕之寵一傳榜帖四協輿言恭惟解元
先輩學通衆說之郭文號諸儒之倡惟其負勢莫當之
勇是以收戰必勝之功閭里嘆咨親交慶羨冠名南省

繼歐老之遺風策第太常合鷺洲之舊識士所望者君
其勉旃某特枉長牋仰欽厚眷綴梁臺之響幸目擊於
俊遊傳漢殿之臚尚耳聞於吉語

謝生日詩啟

乾道五年

四五十而無聞焉方悲鯉饋九萬里斯在下矣敢借鵬
風惟古今善禱之非虛皆人士誠心之所寓儉勤化俗
則介眉詠於豳風豈弟宜民則台背形于魯頌豈伊大
貺乃及小夫此蓋某官仁惟好人喜故溢美篤篤吹噓之

雅意貽比興之新篇愛欲其生雖不稱老彭之比壽胥
與試願同依堯舜之仁

回新進士啟

伏以我后勞于求賢蓋三舉矣吾州慨然上對得五人
焉繼前輩起家之榮為後生稽古之勸舉有愜志曾無
間言竊惟致治之由用儒為急昔者三王而上確乎一
道之承異端興于七雄始綴甲兵而譏書策大亂極於
五季專用鎗劍而鄙毛錐觀歷年長短之不同則擇術

是非之可見今敵氛尚汙於中土而重兵未徹于近邊
常情皆言用武之秋明主獨切右文之念思多士生此
王國豈徒誇三年應詔之多有一德克享天心實欲冀
異日行言之實使齊疆復歸於魯而晉盜悉奔乎秦儒
效若斯武功何有孰仰當于睿意良有待于儒英恭惟
某官躬邁往之資擅博聞之譽以通經而拾地芥固所
優為由舉首而破天荒殆同創見况棣萼繼登于虎榜
而萊衣同拜于鯉庭家慶方來可驗斯文之力邦榮有

待竚恢所學之功某贊喜未遑馳辭先辱鹿鳴歌而楊
侯舉已預榮觀龍標奪而盧肇歸更逢盛事其為欣幸
未易殫論

回江西任運使文薦啟

上閩南之一節已彰畫錦之榮周江右之三臺更示宵
衣之眷既聳吏民之觀聽益增輶傳之光華恭惟某官
德粹而莊學醇以博行已勵廉清之搢立朝高忠肅之
聲臺省要官踐揚殆遍漕刑劇寄績效屢聞復睹舊游

重盼新渥列郡熟知于威惠不令自行近班僕俟于英
賢言歸可待某一違和氣六換嚴冬望孔翠於層霄笑
駕駘於故步尺書懇懇雖疇昔之僅通大貺謙謙愧今
茲之倒置其為欣感未易敷云

賀錢守冬啟

梅放柳舒樂土春回之有象炭輕衡仰明時氣運以無
訛孰闡壽祉于一陽盍酌頌聲于千里恭惟某官承家
忠厚敷政仁明久昭列宿之章存洽介藩之譽袴襦騰

頌視叔度以無慙黻冕為褒舍喬卿而奚稱德逢道長
福以類升某廁迹此廛傾心侯宅官僚交慶豈野服之
敢參鉛槧馳詞尚誠心之少致

回太守賀正啟

乾道六年

東風凍解知和氣之先春南國教明諒嘉祥之斐篤恭
惟某官敷施上澤安輯民生力行寬大之書藹著中和
之譽順迎獻歲行趣朝元屬雪戶之憊居阻牙門之旅
進首勤慶問良極感悰

又回萬安謝令啟

日會姬訾杓攜龍角蠢然品彙俱有向榮之心卓爾仁
賢豈無錫善之福恭惟某官神明所保年德又新奕世
詞章常夢生塘之草三年桃李重開滿縣之花行陪春
見之庭入奉夜前之席某尚稽走慶先辱飛文屬野性
之多慵致報緘之稍緩其為愧感交劇衿膺

與廣西經畧張徽猷啟

茂實飛騰耳熟桂林之伯窮簷局趣夢遊訾氏之洲遙

知五莞之兵民欣頌十連之師帥邊疆清晏福祉綏將
恭惟某官學殖崇高智符庶正竭從別乘姓名已達于
宸廷旋駕輶車風采遂傾于嶺表開帥牙而即拜貼禁
職以頻遷訖共外庸方倚田侯之績式是百辟即遄山
甫之歸某披霧尚賒傾風更切雖衡嶽元回于乘雁而
灕江不礙于雙魚惓惓之私喋喋奚既

答吉州新倅趙朝散堽啟

側聽詔除來參邦治風飄遠涉阻脩惟梓之恭騎吏鼎

來先辱摘華之麗一謙過厚三復增慙恭惟某官廟璉
凝姿澗松挺搯政術久高于吳會典刑未替于洛京眷
此廬陵雄於江介顏魯公之鯁挺尚屈佐州向文簡之
才猷亦勤監郡雖小淹于遐武諒遠繼于前模某從事
無堪乞歸甚切行同野老重詠海沂之功更俟召環敬
酌齊人之水

除閩憲赴闕奏事與宰執啟

坐廢八年莫瞻上袞安居三徑每荷大鈞雖依歸造化

以甚勤而通徹姓名之無路忽叨進擬倍劇兢慚念扣
閣以非遙愧達函之已後伏念某少而孤苦長則迂愚
但信一心欲致身名之泰逮逢多難乃知骨相之屯得
未足以償亡譽不勝于積毀竭從幽屏痛悟昨非甘為
灌園負耒之遊寧復結綬彈冠之望豈謂起之野服假
以繡衣惟盛世難逢非不抱貧賤之恥惟軺車甚寵非
不貪禮樂之華願才諳之無堪且病衰之有素冒陳私
悃洊瀆公朝當文王之作興適伊尹之自任有來多士

共圖王室之寧不使匹夫獨隔聖人之澤遭逢若此進
退何居恭惟某官皇極為心泰和斯世身兼九德不以
尚人士挾寸長豈容在野善類聞風而望賜治功指日
而格天如某者何足記憐亦叨收拭始逡巡以避蓋自
揣于非材今竭蹶而趨懼固違于成命倘得一登九級
之陞退望三槐之庭雖汰斥隨之而志願償矣天暑未
艾巖瞻正宗冀加御於鼎珍以永隆於邦棟

除少蓬答史徽州侯啟

持節分符已叨起廢登瀛視草更許參華揣分量以無
堪啟緘縻而有覲此蓋伏遇某官仁心念舊義概噓枯
曲憐流落之餘每借游揚之助遂令新渥併及陳人載
惟兩郡之政聲久在一時之課最民之攸暨恐非賜金
加地之可酬王曰逆歸竊意鳴玉朝天之甚邇倘寬汰
斥尚幸瞻承茲粗答于多儀殊未殫于鄙志

答吉州太守呂治先大器啟

昨審拜州旋聞開府俯稽衆論固當陳何暮之謠久受

一廛又合致必恭之禮屬疲精于道路加庀職于闕廷
力有未遑心焉不置逮疊勤于翰墨幾莫措于面顏恭
惟某官躬稟異材家傳奧學分麾兩郡課以最聞列屬
中臺譽隨日起眷東南之上郡實六一之故鄉調守甚
艱非公莫可銷民愁嘆將見古人之風戢吏矯虔更觀
仁者之勇某雖未獲依豈弟慈祥于里閭之內猶庶幾
誦中和宣布於搢紳之間尺牘所陳寸誠奚既

回寧國守姜待制啟

遇雙旌于吳郡僅容漫刺之通望千騎于昭亭未暇空
函之達忽披榮問增愧懦衷恭惟某官望重簪紳眷深
旒宸宜服四鄰而熙載豈容一日而去朝適是名藩困
于巨浸輟嚴徐之侍從倚召杜之蕃宣惠政甫施顧憂
旋釋雙溪疊嶂亟賡謝守之詩四牡介圭行趣韓侯之
覲某比自漁樵之侶來參鷓鴣之行念揣分以非宜方
陳情而引去欲酬大貺莫措片言姑陳感激之私少答
記存之厚

回李秀實發啟

垂釣江湖久斷修門之夢牽絲館殿再追雋軌之遊
逡巡何止于三辭荏苒已踰于半載推鄉評而有自脩謝
牘以未遑忽披執訊之書曲借過情之譽禮文倒置愧
感中彌恭惟某官學造乎微才周于用治效早彰于四
邑政聲尤著于五州當馬援據鞍之秋堅陶公運甕之
志衆期明陟事乃暗投吏疑絳老之年晉卿有罪上讀
子虛之賦蜀監非人載惟貴齒之時仍在急賢之際朝

冠暫挂未妨新組之頒塞馬重來即慶舊羶之復願究
觀頤之理亟承傾否之休

答巫樞密謝復職啟

乾道七年

上眷舊勞制如新渥冠六閣邃嚴之職遂二踈冲退之
懷褒語一傳輿言胥穆恭惟某官英規表世奧學邁倫
用之則行殆侍從弼諧之徧歷已之無愠頤卷舒窮達
以何心將觀妙以怡神寧待年而佚老茲推郊輶載簡
宸衷規字西清雖未盡輔臣之寵數角巾東路固已追

前輩之風流惟壽祉之方增諒恩華之繼至某未諧納
謁何敢占詞荷謙德之有光飭誨存而先逮傳子孫而
榮沛郡逝瞻廣德之垂車在機密而歸東平徒羨鄭均
之賜穀其為欣感交集襟臆

遷禮侍回外路啟

貳圖書之府久愧空餐聯筆索之班更叨虛授自知過
矣誰則使然此蓋伏遇某官以揚賢為心推達人之志
靈河滋液助成濡潤之功和氣薰蒸陰假噓枯之惠遂

容最品亦玷高門修謝牘以未遑辱華緘之先逮其為
感愧豈易敷言

回李賢良奎啟

君人者勞于求賢孰當明旨子大夫褒然為首獨副詳
延富哉八千言甚偉之文應此七十載久虛之典冕旒
動色韋布增光竊觀聖朝最重制舉藝祖當艱難創業
之際已設三科仁宗享盛大持盈之期至頒十詔惟所
詢皆當世之要務故所得率一時之異人乃知用儒納

諫之極功豈以右武好文而殊轍天之未喪文不在茲
恭惟某官博洽本于家傳精勤充乎天性賢人事業罔
不窮探流俗施為未嘗肯顧積歲心潛于載籍一朝名
震於京師維昔眉山有如蘇氏明允抱才而不遇文忠
勵志以有成肆惟黃門亦紹素業謂古人不可作矣而
今者曷其繼之豈無他人適在同郡况尊公方正之學
早為先達之所宗而難弟功名之心方勉後圖而未艾
猗中興之盛際復嘉祐之遺風某託契頗深締交恨晚

討論盛舉幸預于司存臚句廣廷復陪于山立曾未遑
於展慶乃先辱于摛詞惟欣感之交懷匪叙陳之可究

謝生日詩詞啟 乾道八年

生我劬勞方切蓼莪之感錫公純嘏過勤黃髮之祈高
誼重於山邱正聲諧于金石穆清風之誦固知鴻筆之
有餘投明月之珠所愧衰蹤之弗稱但深銘佩莫究叙

陳

回添差整務通判鄭通直著啟

載頒詔墨參駕屏星議論聲猷是焉倚重薄書期會非
以煩公恭惟某官守道篤齊魯之風窮經承漢唐之緒
貫險夷于一節隆望實于二車肅肅旆旌寅饒未離于
舊治紛紛候吏懽迎已及於新疆少須坐席之溫別奉
細旃之問豈特兩持金節榮踐世官固應三接彤廷茂
摠賢蘊某投閒于此依庇有初識士龍于雲間竚爭先
睹陪司馬于方外尚託後塵修慶問以未遑辱緘書之
先逮其為欣悚交集襟臆

答豐城主簿全材啟

唱第彤墀起家黃綬任有近鄉之便官無待次之淹喜
動交遊先生里閨竊以文風之盛固在是邦家學之優
獨推甲族師友淵源之遠父兄誨誘之專居有實能殆
無虛榜某官氣由直養學以勤精稟溫柔敦厚之資富
羣怨興觀之識擅經魁者三世聲譽卓然登科選者六
人歲時屬耳發軔勾稽之職問津華要之途氣徹斗牛
難遏豐城之劍枳棲鸞鳳竚旌仇覽之賢某未暇馳詞

先勤飛翰索枯腸之易涸嘆巨筆之難酬愧感交懷敷
陳罔既

回吉州葉守程啟

竊吹西崑親慶虎符之出服勤南畝俶瞻熊軾之來風
動棠陰春生梓里恭惟某官輔仁以義好學而文政事
詳明本躬行于家法聲華赫奕久獨步于仕途佐吳京
則彈壓之效隆鎮楚會則循良之功著尚迂駕載蒞
劇州蓋貢輸獄訟之繁非游刃孰能濟此矧疾疫旱荒

之後惟福星可以庇之帝意則然詔除甚寵朝方信賞
公且遄歸某甫辦尺書猥勤大貺索居無賴顧何幸于
依劉靜治有餘諒不勞于舍蓋忻愉之至敷述奚殫

除富沙荅傅運使自得啟

乾道九年

鷓退飛者六正倦搏風龜左顧者三屢勤刻印戴上恩
之彌厚省愚分以何安屬困乏闕未遑削牘乃屈乘軺
之重先貽執訊之書大貺逆施感悰中積恭惟某官家
聲赫奕天韻高明文華足以穆皇猷智畧足以參國論

問津錦帳將夕拜于瑣闥迂轍繡衣聊畫行于闕部公
既知人之情為人亦稔公之聲猷諒無刺舉之勞坐奏
澄清之最遂班邇列益告遠猷某久矣傾風行焉受察
居閒從任一生自笑于苦心多病非才二事恐煩于并
案依歸之至數述奚殫

謝余監塲生日水晶環詩啟

四十九年往不可復方哦太白感秋之詩千二百歲形
未嘗衰乃佩廣成修身之喻禮將誠而兩厚物與意以

俱新坐我于水晶之宮已慙實惠報君以青玉之案更
愧虛拘循雅眷以難忘服嘉言而無斃

回衆官生日詩啟

倚蒲團而坐長夏昔迷自恣之途數圓著而感流年今
學知非之步猥勤高誼特枉雄篇增風木之深悲重霜
蓬之永慨千歲而壽無害敢當黃髮之祈三嘆而音有
餘徒味朱弦之美其為感荷交集襟襟

文忠集卷二十四